

INUIT ATAQATIGIIT INATSIARTUNI



UKA2025/87-93

09.10.2025

Mimi Karlsen

**Utoqqaat pillugit siunnersuisooqatigiinnik kommunit tamarmik
kingusinnerpaamik ukiakkut ataatsimiinnermi 2027-mi
peqalernissaannut Naalakkersuisut inatsimmik
siunnersuuteqarnissaannut peqqunneqarnissaannik Inatsisartut
aalajangiiffigisassaattut siunnersuut.**

(Inatsisartunut ilaasortaq Jens Nap̃ātôK' Naleraq)

**Utoqqarnut inatsimmik ataatsimik pilersitsisoqarnissaannik
Naalakkersuisut peqquneqarnissaannik Inatsisartut
aalajangiiffigisassaattut siunnersuut.**

(Inatsisartunut ilaasortaq Mariane Paviassen Jensen, Inuit Ataqatigiit)

Oqaaseqaat

Inuit Ataqatigiit utoqqaat inuiaqatigiinni pingaarutilittut isigivagut. Taakkuumata inuunermi suliarpassuamikkut ullumi uatsinnut kinguaassatsinnullu tunniussamikkut ingerlatitseqqittut. Utoqqaat sivilisuumik inooreerlutik ilisimaligaat pingaaruteqarpoq uagut kinguaajusugut nalilittut pingaarutilittullu ingerlateqqissagigut.

Ulluinnarni oqartarnerput: utoqqaat ataqqivagut amerlanerusutigut timitalertariaqarparput. Utoqqartagut ataqqisagutkinguaariinni tamani immikkut isigineqarlutillu iliuuseqarfigineqarnissaat suliuariuartariaqarparput. Meeqqat utoqqarnik ilitseqqussaqarlutik iluaquserneqarnissaat suliarinerusariaqarparput, soorlu meeqqerivinni atuarfinni ilinniartinnilu utoqqaat atorluarnerisigut.

INUIT ATAQATIGIIT INATSIARTUNI



Tamanna kommunini utoqqaat, aammalu utoqqaat peqatigiiffii qanimut suleqatigalugit ingerlanneqartariaqarpoq.

Aammattaaq peqqinnissaqarfiup tungaaniit utoqqaat amerliartorneri ilutigalugit immikkut iliuuseqarfigineqartariaqarput. Nakorsiarfinni peqqinnissaqarfimmi sulisunik nakorsanilluunniit immikkut utoqqarnik ilisimasalinnik atorfeqartoqarsinnaanissaa piffissanngorpoq.

Soorlu Naalakkersuisooqatigiit isumaqatigiissutaanni allaqqasoq, utoqqarnut inatsimmik sulineq nangingneqassasoq, aammalu sulinerup nangingneqarnerani attuumassuteqartutut soqutigisaqartut akuutinneqarnerussasut. Aammattaaq allaqqavoq kommuninik utoqqaallu kattuffinnik peqatigiiffinnillu, utoqqarnut iluaqutaasumik inatsisiliornissaq siunertaralugu oqaloqatiginnilluartoqassaq.

Utoqqaat eqqartorneqarneranni pingaaruteqarluinnarpoq pineqartut peqataatillugit, isumasiorlugillu suliart ingerlanneqarnissaat. Piffissaq qaangiuttariaqarpoq utoqqaat paaqqutassaannartut isiginissaat. Utoqqaammi inuiaqatigiinni pisariaqarluinnartut naligisatsitut pisariaqarpagut.

Maannamut politikikkut aalajangersakkat, utoqqarnut politikki, periusissiallu suliarteqartartut ataatsimoorussamik utoqqarnut politikkilliornissamut piffissanngorpoq. Utoqqarnut namminernut, kommuninut, sullissisunut naalakkersuinikkullu pisariitsumik ataqatigiissartakkamillu politikkeqartariaqalerpugut.

Soorlu Mariane P. Jensen siunnersuutimini oqaatigigaa utoqqarnut inatsimmik ataatsimik pilersitsinissaq, taamaaliornikkunngooq allaffissornikillisaaneq, atuisunullu nalorninaatsumik inatsimmi sorlermi pineqarnerluni nassaarsiorsinnaaneq periarfissaalissammat.

INUIT ATAQATIGIIT INATSIARTUNI



Taamaamat Marianne Paviassen Jensenip siunnersuutaa immikkoortoq **93** Inuit Ataqatigiinniit taperserlugu ataatsimiitsitaliamut susassaqartumut innersuupparput.

Kommunit utoqqaallu suleqatigiilluarnissaat pingaartillugu immikkoortoq **87** kommuuninut kaammattuinnissaq akuersaarlugu ataatsimiitsitaliamuttaaq ingerlateqqipparput.